



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.362/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët: Hajriz Hoti-kryesues, Bujar Muzaqi dhe Violeta Husaj Rugova anëtarë, duke vendosur përkitazi me ankesën e Ardian Foniqi, kandidat i pavarur për anëtar në kuvendin e Komunës së Gjilanit, të paraqitur kundër Komisionit Qendror të Zgjedhjeve (KQZ), për shkak të parregullsive gjatë rinumërimit të votave në Qendrën e Numërimit të Rezultateve (QNR) për Zgjedhjet Lokale, të mbajtura më datë 12 Tetor 2025, në seancën e panelit të mbajtur me 31.10.2025, merr këtë,

V E N D I M

Hedhet e pasafatshme ankesa e parashtruar nga Ardian Foniqi kandidat i pavarur për anëtar në kuvendin e Komunës së Gjilanit, ZL.Anr.362/2025, e datës 29.10.2025, të paraqitur kundër Komisionit Qendror të Zgjedhjeve (KQZ), për shkak të parregullsive gjatë rinumërimit të votave në Qendrën e Numërimit të Rezultateve (QNR) për Zgjedhjet Lokale, të mbajtura më datë 12 Tetor 2025.

A r s y e t i m

Më datë 29.10.2025, PZAP-i ka pranuar ankesën e parashtruar përmes postës me datë 24.10.2025, të kandidatit të pavarur për anëtar të kuvendit komunal në Komunën e Gjilanit, Ardian Foniqi, me të cilën pretendon se ka dyshime në lidhje me procesin e rinumërimit të votave për kuvend komunal në QNR. Nga rezultatet preliminare të publikuara nga Komisioni Qendror i Zgjedhjeve (KQZ) në qendrën e votimit në shkollën "Thimi Mitko" figurojnë 52 vota, ndërsa pas rinumërimit të kryer në Qendrën e Rinumërimit i janë regjistruar vetëm 48 vota, pra 4 vota më pak se në rezultatet paraprake. Me tutje, pretendon se ka mospërputhje në disa vendvotime si në vendvotimin 0402/06, i mungon 1 votë (nga 11 në rezultatet paraprake, tani i figurojnë 10); në vendvotimin 0402/12, i mungojnë 3 vota (nga 4 në rezultatet paraprake, tani i figurojnë vetëm 1 votë). Po ashtu në disa qendra votimi, në fshatin Dobërçan në klasën nr. 4 votat i janë shpallur të pavlefshme. Andaj kërkon që në çdo qendër ku janë shpallur votat të pavlefshme, të bëhet kontroll i plotë për të siguruar që nuk ka pasur ndërhyrje të paligjshme.

Në përgjigjen në ankesë të Komisionin Qendror të Zgjedhjeve-KQZ, sqaron se bazuar në nenin 101 të Ligjit Nr. 08/L-228 për Zgjedhjet e Përgjithshme në Republikën e Kosovës (LZP), Rregulloren Zgjedhore Nr. 16/2024, Qendrat Komunale të Numërimit (QKN), Procedura e Veprimit në Qendrën Komunale të Numërimit për Zgjedhjet Lokale 2025, e miratuar më 01.10.2025, Nr.01/2601/2025, përcaktohet procedura e detajuar lidhur me procesin e numërimit në QKN. Rezultatet preliminare nga vendvotimet mund korrigjohen në Qendrën Komunale të Numërimit, në përputhje me paragrafin 3 të nenit 14 të Rregullores Zgjedhore Nr.

16/2024 për Qendrat Komunale të Numërimit (QKN). Bazuar në Rregullën Zgjedhore Nr.13/2024, Rezultatet Zgjedhore nenin 9 paragrafi 1 thekson se: Në rast të mospërputhjes së rezultateve, KQZ-ja mund të urdhëroj rinumërimin e votave të cilit do VV, ose edhe përsëritjen e votimit në një VV apo QV. Pala ankuese lidhur me ankesën 362, ndër të tjera pretendon se mungojnë votat e votuesve të cilët kanë deklaruar se e kanë votuar. Ky pretendim nuk mund të vërtetohet, pasi që vota është e fshehtë dhe në përputhje me parimet e fshehtësisë dhe lirisë së votës, nuk mund të identifikohet mënyra e votimit të asnjë votuesi. Në lidhje me vlefshmërinë e fletëvotimeve, neni 16, paragrafi 2 i Rregullores Zgjedhore Nr.12/2024, Votimi, Numërimi në Vendvotim dhe Menaxhimi i Vendvotimit përcakton se një votë është e vlefshme kur është shënuar vetëm një subjekt politik dhe kuptohet qartë vullneti i votuesit. Në të kundërtën vota konsiderohet e pavlefshme nëse: janë shënuar më shumë se një subjekt politik; Nuk është shënuar asnjë subjekt politik; Janë shënuar vetë kandidatët, por jo subjekti politik; Qëllimi i votuesit nuk është i qartë. Aktiviteti i QKN në Gjilan është përmbyllur me datë 18.10.2025, ndërsa pala ankesën e ka parashtruar me datë 24.10.2025, përmes postës. Me tutje, KQZ sqaron se në kuptim të nenit 117 paragrafi 3 të LZP, gjatë shqyrtimit të ankesës pala ankuese nuk ka bashkangjitur prova relevante, që do të mund të dëshmonin apo mbështesnin pretendimet e tyre. Andaj, pas analizimit të lëndës është vërejtur se pala ankuese ankesën e ka paraqitur jashtë afatit ligjor për paraqitjen e ankesës, sepse pas konfirmimit, aktiviteti i QKN-së është përmbyllur me datën 18.10.2025, ndërsa pala ankesën e ka parashtruar me datën 24.10.2025, përmes postës. Pra nuk është brenda afatit ashtu siç parashihet me nenin 105, par.1 të LZP. Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes së supozuar.

Paneli Zgjedhor për Ankesa dhe Parashtrës, pas shqyrtimit të ankesës dhe shkresave të lëndës vëren se ankesa është e pasafatshme

Në këtë rast, PZAP nga shqyrtimi i shkresave të lëndës, ankesës së ankuesit, përgjigjen në ankesë të KQZ-së vërtetohet se parashtruesi i ankesës ka dorëzuar ankesën me datë 24.10.2025, ku ka pretenduar se ka pasur parregullsi në numërim të votave, ndërsa sipas përgjigjes nga KQZ dhe provave të bashkangjitura procesi i numërimit në Qendër Komunale është përmbyllur me datë 18.10.2025.

Sipas Ligjit Nr.08/L-228 për Zgjedhjet e Përgjithshme në Republikën e Kosovës nenit 105 paragrafi 1, përcaktohet se *“Ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes së supozuar.”*

Po ashtu sipas nenit 9 paragrafi 5 të Rregullores Nr.01/2025 për Procedurat e Parashtrimit dhe Vendosijes së Ankesave të PZAP-it, përcaktohet se *“Personi mund të paraqes ankesë në PZAP, brenda dyzet e tetë (48) orëve për shkeljet e pretenduara.”* Ndërsa neni 13 paragrafi 3, i të njëjtës rregullore përcakton se *“PZAP-i e hedhë ankesën kur vlerëson se ajo nuk është dorëzuar në afatin e paraparë ligjor.”*

PZAP vëren se nga përgjigja e KQZ dhe provave të bashkangjitura të njëjtës është vërtetuar fakti se aktiviteti i QKN-së në Komunën e Gjilanit, është përmbyllur më datë 18.10.2025, kurse ankuesi ankesën e ka parashtruar në PZAP më datë 24.10.2025, me çka vërtetohet se ankesa e

ankuesit nuk është paraqitur brenda afatit ligjor prej 48 orëve siç parashihet me nenin 105, paragrafi 1 të Ligjit për Zgjedhjet e Përgjithshme në Republikën e Kosovës.

Nga arsyet e theksuara më lartë dhe duke u bazuar nenin 105 paragraf 1 i LZP-së, nenit 117 paragrafi 3, dhe nenit 118 paragrafi 1 të Ligjin Nr.08/L-228 Për Zgjedhjet e Përgjithshme në Republikën e Kosovës, lidhur me nenin 9 paragrafi 5, nenin 13, neni 13 paragrafi 3 nën paragrafi 3.2 të Rregullës Nr.1/2025 për Procedurat e Parashtrimit dhe Vendosjes së Ankesave, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.362/2025, datë 31.10.2025



Këshillë Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.